

Okushwekuurwa

kw'Obusingye Mushanju bw'Ekanisa

Eshuura ya Kabiri

Okworekwa Kwa Patumo

Okushuuruurwa 1:9 - 20

Yohaana Ahari Patumo

Okushuuruurwa 1:9,

“Nyowe Yohaana mwene waanyu, okwataniise naimwe omuri Yesu (Kristo) omu busaasi n'omu bukama n'omu kugumisiriza, nkaba ndi aha kirwa Patumo, ntuzirwe Ekigambo kya Ruhanga n'okuhamba ebya Yesu (Kristo).”

Okukuratana oku kw'okworekwa kw'Okushuuruurwa kw'Omuntu Yesu Kristo kukaheebwa Yohaana obu yaabaire atwairwe aha Kirwa Patumo nk'ekifubiro. Ekirwa eki ekikye kiri mailo makumi ashatu okuruga aha nyambukiro ya Asia Enkye omu Nyanja ya Aegea. Ahabw'okuba ekirwa ky'enkiri kandi kiiwiremu enjoka, eminya, na zaaskorupio, kikaba kiine omugasho mukye omu by'obushuubuzi, n'ahabw'ekyo kikaba nikikoresibwa obugabe bw'Abarooma nk'omwanya gw'ekifubiro ei baabaire barindira enkozi z'ebibi ezirikukirayo obubi, embohe z'eby'obutegyeki, n'ebindi.

Noija kwetegyereza ku Yohaana ayeyanjwire aha Bakristaayo nk'ow'eishe-emwe ori omu kubonabona. N'omu bwire obu ekanisa eyaabandize yaabaire neeraba omu kuhiigwa kwingi. Ediini yaabo ekaba “atarikujumwa hoonaa hoonaa” kureka abantu bo bonka bakaba bateebwa omu kihome kandi baitwa. Yohaana, nk'omutwe muhango gw'abantu abandi, akaba hati naabonabonera omu nkomo ahabw'Ekigambo kya Ruhanga n'obujurizi bwa Yesu Kristo. Ku yaakwatsirwe, bakageyeho kumwita nibamuteeka omu majuta agarikubira kumara eshaaha makumi abiri na ina kwonka byaba ebya busha. Abategyeki abo abaitsirwe ekiniga kandi bataine maani bwanyima bakamucwera orubanja rw'okumukomera Patumo nk'omurogi. Kwonka Ruhanga akaba ari nawe, kandi yaagirirwa embabazi kuruga aha kirwa kugaruka Efeso ahu yaagarukire kugumizamu nk'omuriisa kuhitsya obwire obu yaafiire.

Okworekwa oku Yohaana yaatungire kukamara obwire bw'emyaka ebiri, kuruga 95-96 A.D. Nikwo kworekwa okurikukirayo omu kworekwa kwona okuri omu Kigambo. Ekitabo kyona kihandiikirwe omu birikushushanisa, n'ahabw'ekyo n'ekimaasho ky'okukyemwa kwingi n'okuteezanaho empaka. Kwonka kiineho akamanyiso ka Ruhanga. Ekyo nikikikora eky'amazima kandi eky'obuguzi bwingi ahari boona abarikushoma nari abarikuhurikiza kuruga omu mpapura zaakyo ezirikwera.

OMU MWOYO AHA KIRO KYA MUKAMA

Okushuuruurwa 1:10, “Aha Izooba rya Mukama nkaba ndi omu Mwoyo, naahurira eiraka rihango nk'ery'enzamba enyima yangye.”

“Nkaba ndi omu Mwoyo.” Ekyo ti kirungi? Mugyenzi, ekyo ninkikunda. Noobaasa kweta ebyo bigambo, “Amagara goona g'Omukristaayo.” Ku turaabe nituza kutuura nk'Abakristaayo, nituteekwa kuba omu Mwoyo WE. Yohaana akaba atarikugamba aha kuba omu mwoyo gwe. Ekyo tikikaareetsireho okworekwa oku. Akaba naateekwa kuba Omwoyo wa Ruhanga. Naateekwa kuba ari Omwoyo wa Ruhanga ori naitwe, kitari kityo okugyezaho kwaitu kwona n'okwa busha. Paulo akagira ati, “Niinyija kushabira omu Mwoyo, niinyija kweshongorera omu Mwoyo, niinyija kutuura omu Mwoyo.” Ku haraabe hariho ekintu kyona ekirungi eki ndikutunga nikiteekwa kushuuruurwa Omwoyo, kihamibwe Ekigambo, kandi kyorekwe n'ebyana ebirikukirugamu. Buzimazima nk'oku Yohaana yaabaire naateekwa kuba omu Mwoyo kuheebwa okushuuruurirwa kukuru munonga kandi kusya kuruga ahari Yesu, nituteekwa kuba omu Mwoyo twaba turi ab'okwetegyereza okushuuruurirwa oku Ruhanga atuhairu kutubaisaho omu Kigambo Kye, ahakuba n'Omwoyo omwe.

Kireebe omu buryo obu. Abantu baingi bashoma Baiburi ahu erikugira omu Byakozirwe 2:38 eti, “Mweteise, mwena mubatizibwe omu Iziina rya Yesu Kristo, mubone kusaasirwa ebibi byanyu; kandi nimwija kuheebwa ekiconco ky'Omwoyo Orikwera,” kwonka bakirabaho batakifiireho. Tibakireeba. Kuri nibakireeba, ahabw'okutaaha omu Mwoyo, bakaamanyire ngu ku baraabe nibenda kutunga Omwoyo Orikwera, bashemereire kweteisa kandi bakabatizibwa omu Iziina rya Mukama Yesu reero Ruhanga akaagyemesereziibwe kuhikiiriza Ekigambo Kye naabaijuza Omwoyo Orikwera. Tibataaha omu Mwoyo We ku kyakubaire kityo kikababaireho omu bwijwire nk'oku Ekigambo kirikugamba. Shaba Ruhanga akuhe okushuuruurirwa ahabw'Omwoyo We. Egyo n'entambo y'okubanza. Taaha omu Mwoyo.

Ka nkorese eky'okureeberaho ekindi. Ku waakuba nooyetenga okutambirwa. Ekigambo kigamba ki? Mpaho, twena tukishomire emirundi etarikubarwa, kwonka titurataahire omu Mwoyo obu twabaire nitukishoma. Tukashaba Ruhanga kutuha Omwoyo We kutwegyesa amazima agahikire gaakyo? Kuri twakikozire, tukaayetsire

abakuru b'ekanisa, twatura ebibi byaitu, tusiigwa amajuta kandi tushabirwa, kandi ekyo kikaabaire kityo. Nikibaasa kutabaho ahonaaho, kwonka omu Mwoyo We, nikiba kihweire. Tihariho eiramuriro erindi ry'okujurizamu. Ruhanga naija kuhikiiriza Ekigambo Kye. Oo, nitwetenga kutaaha omu Mwoyo, reero obwo ebintu nibiza kukorwa. OTABANZA KURABA OMU BIKORWA. TAAHA OMU MWOYO REERO ORABE OMU BIKORWA KANDI OREEBE EKI RUHANGA ARIKWIJA KUKORA.

Oreetegereize oku ensi etaaha omu mwoyo gw'ebintu ebiri omu nsi? Nibaza omu mizaano yaabo y'emipiira, emizaano yaabo y'okweshemeza, hamwe n'omu kuzina kwabo. Bataaha omu mwoyo gwakyo. Tibashutama aho kwonka nk'ebimuri ebitaakire ekisiika, nk'obuti bwa kare obwomire. Bataahira kimwe omu kwehuriramu ebintu ebyo kandi baba kimwe nabyo. Kwonka, oo, ka nibanga Abakristaayo ahabw'okutaaha omu Mwoyo gw'Ekigambo kya Ruhanga. Nibatweta abarikurengyesereza kandi abarikwera abeekuringa ahansi. Tihaine ekintu eki batarikwija kukora kworeka rwango n'okutasiima. Kwonka ekyo okyehuzye. Ekyo okitegyereze, orikumanya ei kirikuruga. Gumizamu otaahe omu Mwoyo gw'okuramya.

Omwoyo gwaitu gushemeire. Ni musya. Guriho. Gutebeekaine kandi nigufayo kwonka n'obu kiraabe, gwijwire okushemererwa kwa Mukama. Abakristaayo bashemereire kuba abarikwesiima kandi baijwire oburungi Bwe omuri Mukama nk'oku ensi eba neenurirwa kandi neeshemererwa omu by'okweshemeza byayo. Abakristaayo kandi n'ab'ensi boona n'abantu; boona bakyamukirira. Entaaniso eri ngu emitima y'Abakristaayo n'okucamukirira kwabo biri aha Kitiinisa kya Mukama na rukundo Ye, kunu ab'ensi bo bahaazy a omubiri.

Hati nikigira ngu Yohaana akaba ari omu Mwoyo aha Izooba rya Mukama.

Oo, mugyenzi, hanu hariho omushororongo buzima ogurikureeta empaka. Ti kugira ngu nigwetaagisa, nari gushemereire kureeta empaka, kwonka buzima bamwe tibareeba eki Ekigambo kigamba buzima.

Eky'okubanza kya byona nitushanga abantu bamwe barungi barikweta Eizooba rya Mukama, Eizooba rya Sabato, eri ahari bo riri Orwamukaaga. Kandi hariho abandi abarikweta Eizooba rya Mukama, Sande, ekiro ky'okubanza omu saabiiti. Kwonka nikibaasa kita kuba kimwe omuri aga mazooba, nari amazooba aga abiri wagagaita hamwe, ahakuba Yohaana akaba ari omu Mwoyo naaheebwa okworekwa okwo kumara emyaka ebiri. Omu mazima ekyabaireho kikaba kiri ngu Yohaana akabakurwa omu Mwoyo yaatwarwa omu Izooba rya Mukama, eririkwenda kwija. Baiburi neegamba aha Izooba rya Mukama eriribaho omu biro by'omu maisho, kandi Yohaana hati naareeba ebintu eby'eryo izooba ery'ebiro by'omu maisho. Kwonka obwa hati kutebeekanisa emitima yaitu, reka tusherure omu bwijwire eki Sabato eri ebiri ebi.

Sabato, nk'oku turikugimanya okuruga omu Ndagano Ensy, TI kugira ekiro eki waayeza. Titwine kiragiyo kyona buzima eky'okutuma twayeza Orwamukaaga nka Sabato, n'obu kwakuba kugira ekiragiyo ky'okutuma twayeza eizooba ry'okubanza omu saabiiti, niyo Sande. Amazima ga Sabato ngaga, ekirikumanyisa "okuhuumura." Abaheburaayo 4:8-10, "Ahakuba kuri noogira ngu Yoshua akabaha oburuhuukiro (nari eizooba ry'okuruhuukiraho), Ruhanga takugambire ha kiro ekindi bwanyima. N'ahabw'ekyo hakiriho sabato (ekihuumuro) y'okuhuumuriraho ebiikiirwe abantu ba Ruhanga; ahakuba omuntu weena otaahire omu buruhuukiro bwa Ruhanga, biri ahuumwire emirimo ye, nk'oku Ruhanga yaahuumwire Eye." Waahurira ebigambo bikuru omu kicweka ky'aha muheru ky'omushororongo ogu? "Ruhanga akahuumura emirimo Ye." Ruhanga akaha Abaisraeli ekiro kya mushanju kuba Sabato yaabo, okwijukiraho emirimo Ye obu Yaahanga ensi n'ebiyabaire bigirimo byona, reero yaarekyera aho kuhanga. Akaheza emirimo Ye. Yaahuumura. Hati kikaba kiri kirungi kuha Sabato y'ekihuumuro abantu abaabaire bari omu mwanya gumwe obwire bumwe, kugira ngu boona bagire ekiro eki baarinda. Eriizooba ekicweka kimwe ky'ensi kiri omu mushana kandi obwo ekicweka ekindi kiri omu mwirima, n'ahabw'ekyo ekyo tikirikubaasa kukora na kakye. Kwonka okwo n'okuteera empaka oyegamiire eby'obuhangwa.

Reka tureebe eki Baiburi erikutwegyesa ahari Sabato egi ey'ekihuumuro. "Ahakuba omuntu weena otaahire omu buruhuukiro bwe." Oku kutaahamu ti kutaahamu kwonka, kureka n'okugumamu, omu buruhuukiro obwo. "N'oburuhuukiro obutahwaho" obu ekiro kya mushanju kitari kindi kureka ekirikushushanisa kyabwo. "Mushanju" n'okumariira. "Munaana" n'eizooba "ry'okubanza" ogundi murundi. Okuzooka kwa Yesu Kristo kukabaho aha izooba ry'okubanza omu saabiiti turikuheebwa amagara agatahwaho na Sabato y'ekihuumuro ekitahwaho. N'ahabw'ekyo nitureeba ahabw'enki Ruhanga atarabaasize kugira ekiro na kimwe kya saabiiti eki yaatuha nka Sabato (ekihuumuro). "Tutaahiremu," kandi "nituguma omu" kihuumuro kyaitu, eki Israeli etarabaasize kukora, eyaabaire eri ekicuucu kwonka ky'ekintu eky'amazima eki turikushemererwamu. Ahabw'enki tugaruka enyima omu kicuucu kandi obwo twine ebiriho by'amazima hati?

Oku turikutunga ekihuumuro eki, nari Sabato erikugumizamu, n'ahabw'okweta kwa Yesu. Akagamba omuri Matayo 11:28, 29, "Imwe mwena abaruhire n'abaremereirwe, mwije Ahariinye, Mbaruhuure. Mwekorere omugamba Gwangye, muunyegeyereho; . . . naimwe muryatunga okuhuumura (nari okurinda Sabato, ritari izooba, kureka amagara agatahwaho, Sabato) omu mitima yaanyu." N'obu waakuba omazire obwire buraingwa orikubonabonesibwa omutwaro gw'ekibi, n'obu yaakuba emyaka ikumi, makumi ashatu nari makumi ataano, nari okukiraho, ija n'amagara gaawe agaruhire kandi noiya kutunga ekihuumuro Kye (Sabato y'amazima). Yesu naija kukuha ekihuumuro.

Hati buzima ni kihuumuro ki ekyo eki Yesu aha? Isaaya 28:8-12, "Emeeza zoonza ziiwire entanaki n'oburofa, tihariho hashemeire hoona. (Abayuda nibatsyorera nabi bati:) Mbweni shi, n'oha ou Aryegyesa obwengye?

Kandi n'oha ou Arishobororera obutumwa? Noogira ngu n'encuukye ezirugire aha mabeere? Ahakuba Ebye n'okwongyera ekiragiro aha kiragiro, ekiragiro aha kindi, omushorongongo aha mushorongongo, n'omushorongongo aha gundi, aha kakye, hariya kakye. Tikwo; kureka abantu b'eminwa y'endugamahanga, abarikugamba orundi rurimi, nibo Mukama arigambiriramu aba bantu, abu Yaagizire ati: Okwo nikwo kuhuumura (Sabato); murekye oruhire ahuumure (nari okurinda Sabato Ye); kandi oku nikwo kuruhuuka. Kwonka baayanga kuhurira.” Hanu kikaragurwaho kurungi omuri Isaaya. Kandi kikabaho bwanyima y'emyaka nka 700 ahari Pentekoote obu boona baijura Omwoyo Orikwera buzima nk'oku kyabagambirweho. Egi niyo Sabato ey'amazima eyaaranisiiibwe. N'ahabw'ekyo ku baijwire Omwoyo Orikwera baahuumura emirimo yaabo ey'ensi, ebikorwa byabo by'ensi, emihanda yaabo emibi. Omwoyo Orikwera akategyeka amagara gaabo. Baataaha omu kihuumuro. Ekyo nikyo kihuumuro kyawe. Egyo niyo Sabato yaawe. Tiriri izooba, n'obu gwakuba omwaka, kureka obutahwaho bw'okwijura n'okuheebwa omugisha omu Mwoyo Orikwera. Niiwe kureka kukora, Ruhanga akakora. Ni Ruhanga omuriwe orikukunda kandi Akakora nk'oku Arikusiima.

Ka ngire ekindi kimwe eki naagamba aha barikushoma Orwamukaaga abarikugira ngu tuteerana aha izooba erigwire ery'omu saabiiti ku tuteerana aha Sande, ekiro ky'okubanza. Hanu hariho eki Justin yaaambire omu kyasha kya kabiri. “Aha Sande habaho okuteerana kwa boona abatuura omu ndembo n'omu byaro, kandi ekicweka kishomwa omu byahandiikirwe entumwa kandi n'ebihandiiko obwire bwaba bukiriho. Okushoma ku kurikuhwa, omwebembezi omu kugamba abahabura naabeezirikisa kutooreza ebintu ebyo ebikuru. Bwanyima y'eki twena twimuka tushabira hamwe. Aha kuhendera okushaba, nk'oku twashoboorora, omugaati na viinyo babita omu maisho gaitu, babisiimira reero abantu bagarukamu bati, ”Amiina.“ Reero ebyo bintu bigabirwa buri muntu kandi biriibwa, ebindi bitwarwa abadiikoni omu maka g'abaayosha. Abatungi n'abeekundiire obwo bahayo nk'oku barikwenda kandi ebyaheebwayo ebi bikwatsibwa omwebembezi ogabira efuuzi n'efaakazi, embohe, abagyenye abaine ebyetengo.” N'ahabw'ekyo nitureeba ngu abo abarikugira ngu ekanisa y'okubanza ekagumizamu n'omugyenzo gw'Ekijudaaya gw'okuteerana aha izooba ry'aha muheru gwa saabiiti tibarikumanyira kimwe buzima eki ebyafaayo byoreka, n'ahabw'ekyo tibashemereire kwesigwa.

Oo, kuri abantu nibaija Ahariwe haza bakatunga ekyo kihuumuro. Hariho okurira omu mitima yoona ahabw'ekihuumuro ekyo kwonka baingi tibarikumanya eky'okukora. Mbweni bagyezaho kuhunamisa okurira okwo n'enkorera y'ediini y'okurinda ebiro bimwe nari okwikiriza enyikiriza z'ebigombe by'amadiini kandi n'ebigunjano. Kwonka ku baremwa omuri ebyo, abaingi bagyezaho kunywa amaara, okumarira obwire omu by'okweshemeza, na buri kintu eky'omubiri ekirengyesereize, nibateekateeka ngu ahabw'eb'okweshemeza by'ensi nihabaasa kubaho kumarwa. Kwonka omuri ebyo tiharimu kuhuumura. Nibareetsa kandi bamira emibazi kuhuumura emitsi. Kwonka tiharimu kuhuumura omu bintu by'ensi. Nibeetenga Yesu. Nibeetenga okutambirwa kw'omu iguru, ekihuumuro ky'Omwoyo.

Bwanyima abarikukira obwingi omuribo baaza omu kanisa aha Sande. Ekyo ni kirungi. Kwonka n'ahari ekyo tibaine kiteekateeko oku bashemereire kwija omu maisho ga Ruhanga n'okumurama. Yesu akagira ngu okurama okw'amazima kukaba kuri omu Mwoyo n'omu mazima, Yohaana 4:24. Kwonka ni kurama kwa muringo ki oku orikubaasa kutunga omu kanisa erikumanya kakye munonga ahari Ruhanga ekata Ishe Kurismaasi ahari Kurismaasi kandi n'obume ahari Paasika? Ekyo bakakiiha nkahi? Bakakiiha omu bapagaani baakihindura kuba kimwe aha nyegyesa y'ekandisa. Kwonka omuntu ku ahindikira Mukama kandi akaijura Omwoyo Orikwera naareka ebintu nk'ebyo byona. Aine ekihuumuro omu magara ge. Buzima atandika kuba ohuriire, n'okukunda Ruhanga n'Okumurama.

Hati reka tugarukye aha Kyahandiikirwe kyaitu. Nitumanya eki Eizooba rya Mukama ritari. Ryaba ritari Rwamukaaga nari Sande, ni riiha? Shana, reka tukigire tuti. Buzima Izooba eri tiryio Izooba rya Mukama. Eri n'eizooba ry'omuntu. N'okukora kw'omuntu, omurimo gw'omuntu, ekanisa y'omuntu, ekiteekateeko ky'omuntu ky'okurama, buri kintu kyona n'eky'omuntu, ahakuba n'ensi y'omuntu (enkora y'ensi). KWONKA IZOOPA RYA MUKAMA NIRIIJA. Eego, nikwo kiri. N'okugira ngu omu bwire obu obw'Okushuuruurwa kwa Yesu Kristo, Yohaana akatwarwa Omwoyo Orikwera aha Izooba eryo Erikuru eririkwija. Eizooba rya Mukama n'obu amazooba g'abantu garaahweho. Obugabe bw'ensi egi obwo buryaba obugabe bwa Ruhanga waitu. Eizooba rya Mukama n'obu okufubirwa kuribaho, reero bwanyima y'ekyo habeho okutegyeka kwa Kristo kw'emyaka rukumi. Obwa hati ensi neekora Omukristaayo eki erikwenda kumukora. Nibamweta amaziina mabi goona aga buri muringo, nibamushungisa. Kwonka nihaija kubaho ekyo kiro kikuru ekirikumanywa obu bariborooga kandi bakaamuriza ahaiguru, ahakuba Omwana gw'Entaama naija n'ekiniga kucwera ensi orubanja. Obwo nibwo abahikiriire barigira eizooba ryabo na Mukama, ahakuba ababi baryatsya kandi abahikiriire baryaribatiirira eiju ryabo omu kutegyeka kwa Kristo kw'emyaka rukumi. Malaki 4:3, “Aha izooba eri Ndikoreraho, muryaribatiirira ababi, babe eiju ahansi y'ebigyere byanyu; nikwo MUKAMA ow'amahe arikugira.”

EIRAKA NK'ERY'ENZAMBA

Okushuuruurwa 1:10, “Naahurira eiraka rihango nk'ery'enzamba enyima yangye.” Yohaana akaba ari omu Mwoyo, kandi ku yaabaire ari omu Mwoyo, yaareeba ekiro kikuru kandi ekirikutangaaza kya Mukama Yesu kandi n'amaani Ge goona agarikwera. Eby'obwire bw'omu maisho bikaba biri haihi kushuuruurwa ahakuba Ruhanga akaba ari haihi kwegyesa Yohaana. Yohaana taragambire ngu ekaba eri enzamba. Ekaba eri nk'enzamba. Hati enzamba ku eteerwa eba eine eki erikugamba eky'ahonaaho. Neeshushanisibwa nk'ekirikubandiza, entumwa y'omugabe, naizira abantu. Ateera enzamba. N'okweta okw'ahonaaho. Abantu beeterana kuhurira. (Israeli

buriijo ekaba eyeshorooza ahabw'okuteera enzamba). Ekintu kikuru kiri haihi kubaho. "Rihurire." N'ahabw'ekyo eiraka eri rikaba riine obwire bw'okweshengyereza kw'obwira nk'obw'enzamba. Rikaba nirihurirwa kurungi, kandi n'amaani, nirikangananisa kandi nirisisiimura. Oo, kuri nituhurira eiraka rya Ruhanga nk'enzamba ebiro ebi, ahakuba "n'Enzamba y'Engiri" erikurangirira "Ekigambo ky'Obunabi" kugira ngu tumanye, kandi tweteekateekyere, ekirikwija omu nsi.

OKURAGIIRWA KUHANDIIKA

Okushuuruurwa 1:11, "Nirigira riti: (Niinye Alufa na Omega, ow'Okubanza kandi ow'Aha muheru: kandi) Ebi oraareebe obihandiikye omu kitabo, okyohereze amakanisa aga mushanju, eya Efeso, Sumuruna, Perugamo, Suatira, Saadi, Filadelufia na Laodikia." Nkiki hanu. Ow'Okubanza kandi Ow'aha muheru, Alufa na Omega: Niwe BYONA. Ruhanga omwe ow'amazima. Eiraka kandi Ekigambo kya Ruhanga. Ekiriho kandi eky'amazima kiiriire haihi. Ka n'ekintu kirungi okuba omu Mwoyo. Mugenzi, kuba omu kubaho kwa Ruhanga kandi okahurira kuruga Ahariwe! "Ebi oraareebe obihandiikye omu kitabo, okyohereze amakanisa mushanju." Eiraka eryagambire Ekigambo Kye omu Kibanja kya Edeni kandi n'aha Rushozi Sinai, niryo eiraka na mbwenu eryahuriirwe n'ekitiinisa kingi aha Rushozi rw'Okuhindurirwaho, rikaba rigarukire kugamba, kandi omurundi ogu nirigambira amakanisa mushanju riine okushuuruurwa kwa Yesu Kristo okwijwire kw'aha muheru.

"Handiika okworekwa oku, Yohaana. Okuhandiikye ahabw'obusingye oburukurataho, ahakuba n'obunabi bw'amazima OBURIKUTEEKWA kubaho. Okuhandiikye kandi okwohereze, kumanywe."

Yohaana akeetegyereza eiraka eryo. Oo, noiya kwetegyereza eiraka eryo ku Araayete ku oraabe ori omwe ahari Abe.

EBIKONDO BY'ETABAAZA EBY'EZAABU

Okushuuruurwa 1:12, "Ahonaaho naahinduka kureeba (eiraka ry') owaabaire naagamba naanye; ku naahindikire, naareeba ebikondo by'etaabaza mushanju eby'ezaabu." Yohaana tarikugira ngu akahinduka kureeba ogwo ou yaahuriire eiraka rye, kureka akahinduka kureeba eiraka. Oo, ninkunda ekyo. Akahinduka kureeba eiraka eryo. Eiraka n'omuntu ni kimwe kandi nibishushana. Yesu n'EKIGAMBO. Yohaana 1:1-3, "Bwa mbere na mbere hakaba hariho Kigambo; Kigambo ogwo akaba atuura na Ruhanga; kandi Kigambo akaba ari Ruhanga. Ogwo omu kutandika akaba ariho na Ruhanga; ebintu byona niwe yaabihangire, kandi omu byahangirwe byona tihariho kintu na kimwe eki atarahangire." Ku waakubaasa buzima kuhika aha kureeba Ekigambo nooba nooreeba Yesu.

Yohaana ku yaahindikire yaareeba ebikondo by'etaabaza mushanju eby'ezaabu. Buzima bikaba biri ebikondo by'etaabaza. Kandi kurugiirira aha mushororongo gwa 20, nigo makanisa mushanju: "Ebyo bikondo by'etaabaza mushanju eby'ezaabu ebi waareeba nigo makanisa mushanju." Kugira ngu bishushanisibwe n'amakanisa tibirikubaasa kuba amatabaaza. Etaabaza neeyaka ahabw'akaanya kakye etyo eraara. Eraarira kimwe. Haba hatakiriho kindi kitsigaire. Kwonka ebikondo by'etaabaza biine obuhangaazi burungi obutarikushangwa omu matabaaza.

Waaba nooyenda kutunga ekishushani kirungi ky'etaabaza, kishome omuri Zekaria 4:1-6, "Bwanyima Maraika owaabaire naagamba naanye yaagaruka yansisiimura, nk'oku omuntu asisiimurwa omu turo; yangira ati: Nooreeba ki? Naamugira nti: Nindeeba ekikondo ky'etaabaza eky'ezaabu nsha, ekiteekirweho orwabya, kandi ekiriho amatabaaza mushanju, buri emwe eine eminwa mushanju. Kandi aha rubaju rwakyo hariho emizeituuni ebiri, gumwe aha rubaju rwakyo rwa buryo, n'ogundi aha rwa bumoshu. Naabuza maraika owaabaire naagamba naanye nti: Ebyo amakuru gaabyo niki, Mukama wangye? Maraika owaabaire naagamba naanye yambuza ati: Ebyo torikumanya amakuru gaabyo? Naagarukamu nti: Ngaaha, Mukama wangye. Bwanyima yangira ati: Eki n'Ekigambo eki MUKAMA arikutuma ahari Zerubabeeli, naagira ati: Ti habw'amaani kandi ti habw'obushoboorozi, kureka "n'ahabw'Omwoyo" Wangye; nikwo MUKAMA ow'amahe arikugira." Hanu hariho endiijo tabaaza y'ezaabu eshemeziibwe. Neeyaka munonga ahabw'okuba eine amajuta maingi agu erikwiha omu miti y'emizeituuni ebiri eyemereire ahari buri rubaju. Emiti ebiri egi neeshushanisibwa n'Endagaano eya Ira hamwe n'Endagaano Ensyay, kandi TIhariho kubanganisa amajuta nigashushanisibwa n'Omwoyo Orikwera, Ou We wenka arikubaasa kuha abantu omushana gwa Ruhanga. Maraika owaagambire na Zekaria akaba omu buryo obundi naagira ati: "eki eki orikureeba nikimanyisa ngu ekanisa terikubaasa kugira eki yaayekorera kyona ahabw'amaani gaayo gonka, nari obushoboorozi, kureka ahabw'Omwoyo Orikwera."

Hati shwijuma ekikondo ky'etaabaza eki. Noiya kwetegyereza ngu kiine orwabya rw'amajuta ruhango, nari ekintu ky'okubiikamu amajuta, ahu ebikondo mushanju birikutsibuka. Orwabya oru rwijwire amajuta g'emizeituuni agarikusheneneka nigaraba omu ntambi mushanju eziteirwe omu mikono mushanju. Nigo ago majuta agarikwaka kandi gakareeta omushana aha muheru gw'ezo nshekye mushanju. Omushana ogu gukaba gutaraara. Abanyamurwa bakaba baguma nibashuka amajuta omu rwabya oru rw'amajuta.

Etabaaza ekaba ehembwa omu muringo gw'omutaano. Eky'okubanza, omunyamurwa akaba aguha omuriro okuruga aha itambiro eririkwera eryabaire omu kubanza rihembirwe omuriro gwa Ruhanga. Okubanza kwa byona, akaba ahemba, etabaaza eyaabaire eri ahaiguru y'orwo rwabya rw'amajuta. Bwanyima ahemba etabaaza ya kabiri aha rurimi rw'omuriro rw'etaabaza y'okubanza. Etaabaza ya kashatu ekaba etunga omuriro aha tabaaza

ya kabiri, nk'oku n'eya kana yaabaire etunga omuriro gwayo aha ya kashatu, n'okugumizamu batyo, okuhitsya obu etabaaza zoonza mushanju zaabaire zaaka. Omuriro ugu ogurikwera kuruga aha itambiro, guguhirwe kuruga aha tabaaza okuza aha ndiijo tabaaza, n'eky'okutangaaza ekirikushushanisa Omwoyo Orikwera omu Busingye mushanju bw'Ekanisa. Okushukwaho okwabandize okw'ahari Pentekoote (okushukwaho okwo okwarugiire kimwe ahari Yesu aha Kitebe ky'Embabazi) nikuheereza Ekanisa Ye amaani omu busingye mushanju bwona, kandi kworeka kurungi ngu Yesu Kristo tahinduka; oku abaire ari nyomwabazyo, n'eriizooba nikwo ari kandi nikwo ariguma ebiro byona, Ruhanga otahinduka oku ari n'entwaza Ze.

Omuri Yohaana 15, Yesu akagira ati, “Nyowe ndi Omuzaabibu, imwe muri amataagi.” Niwe Omuzaabibu mukuru, ogwo oguruga omu muzi ogwabandize kuruga omu mbibo eyaabandize eine amagara omuriyo. Hati omuzaabibu tigwana bijuma; amataagi nigo gakora ekyo. Hati yetegyereze eki: Noobaasa kutwara omuti gwa “citrus” nk'omuti gw'omucungwa, kandi oguhagikye omu itaagi ry'omuti gwa “grapes,” eitaagi ry'endimu, eitaagi rya “tangelo,” kandi n'emiringo endiijo y'ekyo kika, kandi ago mataagi goona nigakura. Kwonka ago mataagi agahagikirwemu tigakaayana micungwa. Ngaaha sebo. Eitaagi ry'endimu niriza kwana endimu, kandi eitaagi rya “grapes” niriza kwana ebijuma bya “grapes” n'okugumizamu batyo. Kwonka ago mataagi nigaija kuba nigabaisibwaho n'amagara agari omuri ogwo muti. Kwonka omuti ogwo ku gwakutaho itaagi erindi ryagwo nirijja kuba omucungwa kandi ryane emicungwa. Ahabw'enki? Ahabw'okuba amagara agari omu itaagi kandi n'amagara agari omu mpimbi nigashushana kandi obwo kyabaire kitari kityo n'amataagi agaahagikirweho. Ago mataagi agaahagikirweho gakaba gaine obukomooko bwago omu magara kuruga omu miti endiijo, okuruga omu mizi endiijo, okuruga omu mbibo ezindi. Oo, n'ekya buzima neija kwana ebijuma, kwonka terikwija kwana emicungwa. Terikubaasa ahabw'okuba teri eyaabandize.

Okwo nikwo ekanisa eri. Omuzaabibu gwatsiibwemu kandi amataagi gaahagikwamu. Bahagikiremu amataagi g'Ababaputisiti, amataagi g'Abametsodisiti, amataagi g'Abapuresibateeri, n'amataagi g'Abapentekoote. Kandi amataagi ago nigaana ekijuma ky'Ababaputisiti, Metsodisiti, Pentekoote hamwe n'eky'Abapuresibateeri. (Embibo z'ebigombe by'amadiini ezirikwana ebijuma byazo.) Kwonka omuzaabibu ku gwakwija kutaho eitaagi erindi eryagwo, eitaagi eryo nirijja kushushanira kyarimwe n'omuzaabibu ogwo. Nirijja kuba itaagi nk'eryo eryatandikirweho ahari Pentekoote. Nirijja kugamba omu ndimi, riragure, kandi rigire omuriryo amaani n'obumanyiso bwa Yesu Kristo owaazookire. Ahabw'enki? Ahabw'okuba niribaisibwaho n'ebiriisa by'obuhangwa ebiri omu muzaabibu ogwo gwoyini. Nooreeba, rikaba ritahagikirwe omu muzaabibu; rikaba RIZAIRWE omuzaabibu. Amataagi ago agandi ku gaahagikirwemu, eki gaabaasize kukora kukaba kuri okwana ebijuma byago ahakuba gakaba gatazairwe muzaabibu ogwo. Tigarikumanya eby'amagara ago agaabandize n'ebijuma ebyabandize. Tigarikubaasa kumanya ahakuba tigwo gwagazaire. Kwonka kuri gwagazaire, amagara ago agaabaire gari omu mpimbi eyaabandize (Yesu) gakaababairemu kandi gabeeyorekyeramu. Yohaana 14:12, “Buzimazima nimbagambira nti: Orikuunyikiriza, emirimo ei Nkora nawe aryagikora, kandi aryakora erikukira eyangye obuhango, ahabw'okuba Nyowe ningyenda ahari Tata.”

Ebigombe by'amadiini ebirikwebemberwa abantu tibirikubaasa kuzaarwa Ruhanga; ahabw'okuba n'Omwoyo, TI MUNTU, orikuha amagara.

Ka nikishemeza okuteekateeka ahari ezo tabaaza mushanju zirikwiha amagara n'omushana omu rwabya rw'amajuta rukuru ahabw'okuba entambi zaazo zikaba zijabikirwemu. Buri ntumwa y'obusingye bw'ekanisa eyorekirwe hanu. Amagara ge gaine omuriro gw'Omwoyo

Orikwera. Orutambi rwe (amagara) rwibikirwe omuri Kristo. Kurabira omuri orwo rutambi naanywa amagara ga Kristo gonyini, kandi n'aga magara aheereza ekanisa omushana. N'omushana gwa muringo ki ugu arikuha? N'omushana ogwo gwoyini, ogwabaire guri omu tabaaza ey'okubanza eyaahembirwe. Kandi n'okugumizaamu kushuuma omu busingye kuhika omu bwire obwa hati obw'entumwa ey'aha muheru amagara agarikushushana kandi n'omushana ogurikushushana nigweyorekyera omu magara agasherekirwe na Kristo omuri Ruhanga.

Tikugira ngu nitubaasa kugamba tutyo ahari ezo ntumwa kwonka, kureka buri mwikiriza w'amazima naayorekwa butunu hanu. Boona nibanywa okuruga aha nshuro emwe. Boona bajabikirwe omu rwabya rw'amajuta rumwe. Bafiire aha magara gaabo kandi amagara gaabo gasherekirwe na Kristo omuri Ruhanga. Batairweho akamanyiso n'Omwoyo Orikwera. Abaefeso 4:30, “Mutarigwisa kubi Omwoyo Orikwera wa Ruhanga, owaabateereirweho kuba akamanyiso okuhitsya aha kiro ky'okucungurirwaho.” Tihariho omuntu orikubaasa kubashahura omu mikono Ye. Tihaine orikubaasa kukora kubi amagara gaabo. Amagara gaabo agarikureebwa nigaaka kandi nigamurinkana, garikuha omushana kandi n'okweyoreka kw'Omwoyo Orikwera. Amagara g'omunda, agatarikureebwa gasherekirwe omuri Ruhanga kandi gariisibwa Ekigambo kya Mukama. Sitaane tabaasa kubakoraho. N'obu yaakuba rufu tebaasa kubakoraho, ahakuba rufu tekiine rubuuri rwayo; ekituuro kisingwirwe. Ruhanga asiimwe, baine obusinguzi obu omuri kandi n'okurabira omuri Mukama Yesu Kristo. Amiina kandi amiina.

TAKIRI MUNYAMURWA

Okushuuruurwa 1:13, “Kandi ahagati y'ebyo bikondo hakaba hariho Orikuhusha Omwana w'Omuntu, ojwaire ekijwaro ekihikire aha bigyere, kandi ayezirikire orukoba rw'enzaabu omu kifuba.”

Ngugwo Ayemereire, Naashusha Omwana w'Omuntu. Nk'oku eibaare ry'obuguzi bwingi riba rirungi

ryakorwamu empeta, na Kristo nikwo arikuheebwa ekitiinisa ahagati y'amakanisa. N'Ekiro kya Mukama; ahakuba Yohaana Naamureeba ayemereire, atari nk'omunyamurwa, kureka nk'Omuramuzi orikwija. Orukoba rw'enzaabu tirukyezirikwa omu manyaanya ahu abanyamurwa barikuteekwa kurujwara baaba nibaheereza Ruhanga omu Mwanya Ogurikwera munonga, kwonka hati ruri aha mabega Ge, ahakuba hati takiri munyamurwa kureka OMURAMUZI. Hati Yohaana 5:22 yaahikiirira, "Ahakuba na Ishe tacwera muntu weena rubanja, okucwa orubanja kwona akakurekurira Omwana." Obuheereza Bwe buhweire. Obunyamurwa buhweire. Ebiro by'okuragura bihweire. Ayemereire ayezirikire orukoba nk'OMURAMUZI.

EKITIINISA KY'EMIRUNDI MUSHANJU KY'OBUNTU BWE

Okushuuruurwa 1:14-16, "Omutwe Gwe n'eishokye Rye bikaba nibyera nk'ebyoya by'entaama, nibyerera kimwe nk'orubaare; amaisho Ge gakaba gari nk'endimi z'omuriro, ebigyere bye bikaba nibyengyengyeta nk'omuringa ogushemereziibwe omu iziiko, kandi eiraka Rye rikaba nirihoorera nk'amaizi maingi; omu mukono Gwe gwa buryo akwaitsemu enyonyoozi mushanju, omu kanwa Ke haarugamu rurara ey'amoogi abiri, kandi ahamaisho Ge hakaba nihamurinkana nk'eizooba eririkujwisa amaani."

Okweyoreka kwa Yesu ahari Yohaana ka kwamukwatsireho munonga kandi kukamwimutsya omu mwoyo, owaabaire ari omu buzaahe ahabw'Ekigambo, kwonka reeba, EKIGAMBO Ekihuriire hati kyemereire omu maisho ge. Ka n'okworekwa okurikushoboorora gye, ahakuba buri kintu ekyorekirwe kiine amakuru. Ka n'okushuuruurwa Kwe okw'ekitiinisa.

1. Eishokye Rye Niryera nk'Orubaare

Yohaana naabanza kwetegyereza kandi agamba aha kwera kw'eishokye Rye. Rikaba niryera, kandi niryerera kimwe nk'orubaare. Eki kikaba kitari ahabw'emyaka Ye. Oo, ngaaha. Okwera munonga okw'eishokye Rye tikirikumanyisa obukuru omu myaka kureka obumanyi, obukuru, hamwe n'obwengye. Ogwo Otahwaho takura omu myaka. Obwire niki ahari Ruhanga? Obwire n'akantu kakye ahari Ruhanga, kwonka obwengye ni kikuru ahari Ruhanga. Ni nk'obu Sulemaani yaashaba Ruhanga obwengye bw'okucwa emanja z'abantu ba Israeli. Hati ariyo Naija, Omucwi w'emanja z'ensi yona. Aryajwekwa ekirunga ky'obwengye. Ekyo nikyo eishokye eririkwera kandi eririkwengyengyeta ririkumanyisa. Reeba eki omuri Danieli 7:9-14, "Ku naabaire ninkyetegyereza, naareeba ebitebe by'obukama byateebwaho, Omukuru owa Iranaira yaashutama; ebijwaro Bye bikaba nibyera nk'orubaare, kandi eishokye Rye niryerera kimwe nk'ebyoya by'entaama; ekitebe ky'obukama Bwe kiri (nk')endimi z'omuriro, kandi n'enziga zaakyo ziri (nk')omuriro ogurikwaka. Omu maisho Ge haarugamu omugyera gw'omuriro, rukumi emirundi enkumi baamuheereza, na kakumi emirundi obukumi baayemerera omu maisho Ge. Emanja zaatandika kuhurirwa, ebitabo byashuuruurwa. Omuri ako kaanya naareeba kandi naatangaara ahabw'eiraka ry'eryo ihembe eryabaire nirigamba ebintu bikuru. Ku naabaire ninkyetegyereza, egyo nyamaishwa yaitwa, omutumbi gwayo gwacwekyerezibwa, gwaheebwayo kwokibwa omu muriro. Ezindi nyamaishwa ezaatsigaireho zaihwaho obutegyeki, kwonka zaarekyerwa amagara gaazo kumara omwanya n'obunaku. Bwanyima naareeba omuri okwo kworekwa nyekiro, kandi reeba, Orikushusha Omwana w'Omuntu yaija n'ebicu by'omu iguru, yaahika ogwo Mukuru owa Iranaira, yaamurikwa omu maisho Ge; yaaheebwa obutegyeki, ekitiinisa n'obukama, ngu abantu b'amahanga goona, n'enganda zoonza z'endimi ezitari zimwe, bagume Bamuheereze; obutegyeki Bwe n'obutegyeki bw'ebiro byona obutarihwaho, kandi n'obukama Bwe n'obukama obutarimarwaho." Nkikyo aho. Danieli Akamureeba n'eishokye eryo eririkwera. Akaba ari omucwi w'emanja naashuuruura ebitabo kandi naabacwera emanja z'ebihandikirwemu. Danieli Akamureeba naizira omu bicu. Ekyo nikyo buzima Yohaana yaareebire. Bombi Bakamureeba ari omu nshusha emwe. Bakareeba Omucwi w'emanja n'orukoba Rwe rw'okucwisa emanja ruri aha mabega Ge, ayemereire ashemeire kandi ari orikwera, aijwire obwengye, ahikiire kimwe kucwera ensi orubanja omu kuhikiirira. Haleluya.

Nangwa n'ensi neeyetegyereza ekirikushushanisa eki, ahakuba omu biro ebya ira omucwi w'emanja akaba aija kandi atandika kucwa emanja, ajwaire ekyetwekyerero ky'eishokye eririkwera aha mutwe n'ekijwaro ekihikire aha bigyere ekyabaire kyoreka obushoboorozi bwe obwijwire (ekijwaro ekirikuruga aha mutwe kikahika aha bigyere) kureetaho obwinganisa.

2. Amaisho Ge gari nk'Omuriro

Kiteekateekyeho. Amaisho ago rimwe agatarabaasize kuhweza gye ahabw'amarira g'obusaasi n'okubonabonesibwa. Amaisho ago agaarizire ahabw'esaasi aha kituuro kya Lazaaro. Amaisho ago agatarareebire ekibi ky'abo baitsi Abamuhankire aha musharaba kwonka omu busaasi akataka ati, "Taata basaasire." Hati amaisho ago n'endimi z'omuriro, amaisho g'Omucwi w'emanja Orikwija kuzimuurira abo Abaamwangire.

Okucamukirira kw'obuntu oku Yaakizireyo kworeka obu Yaareebeka nk'Omwana w'Omuntu kukaba kuri oku, Akarira kaingi. Kwonka enyima y'okurira okwo n'obusaasi obwo hakaba hariyo Ruhanga.

Amaisho ago gamwe gakareeba okworekwa. Gakareeba hare omu mitima y'abantu kandi gashoma ebiteekateeko byabo byonyini kandi gaamanya emitwarize yaabo yona etari emwe. Ruhanga akaba naareebera omu maisho g'omuntu ofa n'ekiniga kingi munonga, Owaagambiire ahaiguru abaabaire batarikumanya eki yaabaire Ari ati, "Muryafeera omu bibi byanyu, ku muriba mutaikiriize ku Ndiwe." Yohaana 8:24.

“Ku ndaabe ntakora mirimo ya Tata, murekye Kuunyikiriza; kwonka ku Ndaabe ngikora (emirimo ya Tata), n'obu muraabe Mutarikuunyikiriza, mwikirize emirimo.”

Yohaana 10:37, 38. Nka Yeremia owa ira, akaba ari nabi orikucura, ahakuba abantu tibarakiire Ekigambo kya Ruhanga kandi baanaga aha rubaju okushuuruurirwa.

Ago maisho g'ekiniga kingi g'Omuwici w'emanja na hati gariyo nigahandiika eby'amagara g'ebine omubiri byona. Nigairuka oku n'oku nigabuga ensi, tihaine eki Atarikumanya. Naamanya ebyetengo by'omutima kandi n'eki buri omwe amaririire kukora. Tihaine ekisherekirwe ekitarishuuruurwa ahakuba ebintu byona nibireebwa butunu omu maisho g'Ogwo oshoboorora ebyaitu. Kiteekateekyeho, na hati Naamanya ebi orikuteekateeka.

Eego, Ngugwo Ayemereire aho nk'Omuwici w'emanja n'amaisho g'ekiniga kingi kucwa orubanja. Obwire bw'embabazi buhweire. Oo, kuri abantu beeteisa kandi bakasherura amaisho Ge omu kuhikiirira hakiriho obwire kugira ngu babaase kuhindura ekifuba Kye omushogo gwabo ensi etakayagiibwe omurimo mwingi.

3. Ebigyere by'Omuringa

“Ebigyere Bye bikaba nibyengyengyeta nk'omuringa ogushemeziibwe omu iziiko.” Omuringa nigumanywa ahabw'okuguma kwagwo okurikutangaaza. Tihaine ekindi kintu ekirikumanywa eki waakugujwangamu eky'okubaasa kugwongyera kuguma. Kwonka ogu muringa ogurikushoboorora ebigyere Bye gukikizireyo kutangaaza munonga ahabw'okushangwa ngu gukabaasa kuraba omu kigyezo ky'eiziiko ry'omuriro, ekigyezo eki ekindi kintu kyona kitakarabagamu. Kandi ekyo kihikiire kimwe. Ahakuba omuringa nigumanyisa Okucwa Orubanja kwa Ruhanga: encwamu y'orubanja ei Ruhanga yaaragiire kandi akagihikiiriza. Yohaana 3:14-19, “Kandi nk'oku Musa yaahanikire enjoka omu ihamba, nikwo n'Omwana w'Omuntu ashemereire kuhanikwa, ngu omuntu weena Orikumwikiriza aheebwe amagara agatahwaho. Ahakuba oku nikwo Ruhanga yaakunzire atyo ensi, akahayo Omwana We omwe nyamunegyere, ngu omuntu weena Oikumwikiriza arekye kuhwerekyerera, kureka atungye amagara agatahwaho. Mumanye ngu Ruhanga taratumire Mwana We omu nsi kugicwera orubanja, kureka ngu ensi ejunwe Ahabwe. Orikumwikiriza, takuricwerwa rubanja; kwonka Otarikumwikiriza, aherize kurucwerwa, ahabw'okuba taikiriize Iziina ry'Omwana wa Ruhanga omwe nyamunegyere. Kandi oru nirwo rubanja, omushana gwizire omu nsi, abantu baakunda omwirima okukira omushana; ahakuba emicwe yaabo ekaba eri mibi.” Okubara 21:8, 9, “MUKAMA yaagira Musa ati: Heesha enjoka ey'obushogu oburikubabiirira, ogihanikye aha muti; bwanyima oraarumwe enjoka weena, ku araagireebe, naakira. Musa yaaheesha enjoka y'omuringa, yaagihanika aha muti; bwanyima omuntu weena owaabaire arumwa enjoka, ku yaabaire areeba ahari egyo njoka y'omuringa, akira.” Abaisraeli bakaba basiisire. Ekibi kikaba nikiteekwa kucwerwa orubanja. N'ahabw'ekyo Ruhanga akaragiira Musa kuta enjoka y'omuringa aha muti, kandi weena owaabaire agireeba akaba ajunwa okuruga omu kifubiro ky'ekibi kye.

Enjoka y'omuringa aha muti ekaba neeshushanisa ekibi omu Kibanja kya Edeni, ei enjoka yaabeihebiire Haawa, ekatuma yaakora ekibi. Omuringa nigugamba aha kucwerwa orubanja, nk'oku kirikureebwa aha itambiro ry'omuringa ahu ekiheneso ky'ekibi kyabaire kiba omu kitambo eky'aha itambiro. Ruhanga ku yaacwereire Abaisraeli orubanja ahabw'ebibi byabo omu biro bya Eliya, Akazibira enjura kugwa kandi eiguru eririkutukura ryaba nk'omuringa. Hati omu ky'okureeberaho eki nitureeba ngu enjoka eri aha muti neeshushanisibwa n'ekibi ekyaherize kucwerwa orubanja, ahakuba ekozirwe omu muringa, ekirikworeka ngu Ruhanga yaaherize kucwera ekibi orubanja. Reero weena owaabaire areeba egyo njoka aha muti, akaikiriza amakuru gaayo, akaba akirira kimwe, ahakuba ogu gukaba guri omurimo nari okujuna kwa Mukama.

Enjoka aha muti n'ekirikushushanisa ekyo eki Yesu yaizire omu nsi kuhikiiriza. Akaba omuntu kugira ngu Ayekore okucwerwa orubanja kwa Ruhanga ahabw'ekibi. Omusingye gw'eitambiro ry'empongano gukaba guri omuringa gwonka, kirikworeka Omwana gw'Entaama owaitsirwe omusingye gw'ensi gutakatairweho. Orubanja obwo rukaba Rwamugiireho kandi obwo haabaire hatakabaireho basiisi. Okujuna ahabw'okuba okwa Mukama wenka, Akanyuukira omu inyuukiro rya viinyo ry'ekiniga kingi kya Ruhanga ari wenka. Ebijwaro Bye bikagiibwaho eshagama Ye wenka. Ekikoomi ky'omuriro ogurikubuguma ky'orubanja rw'oburyo kandi n'ekiniga kingi kya Ruhanga nigwo gwabaire omugabo Gwe. Akabonabonesibwa, ohikiriire ahabw'abatahikiirire. “Oshemereire, Oo Mwana gw'Entaama wa Ruhanga, ahakuba Iwe okatucungura n'eshagama Yaawe.” Akahutaazibwa ahabw'eby'okushiisha byaitu, Yaahondahondwa ahabw'okutahikiirira kwaitu; okuteerwa kw'okutereetera obusingye Niwe yaakuteirwe, kandi emihiririzi Ye niyo etukiza. Mukama Akamutaho okutahikiirira kwaitu twena. Akabonabona okukira oku ondiijo muntu weena yaabaire arabonaboine. Atakagiire n'aha musharaba Akaba yaaragaize amatondo mahango g'etuutu garikushusha nk'eshagama kuruga omu mubiri Gwe omu busaasi bw'okubonabona okwabaire kuri omu maisho eshagama Ye ekeebaganisamu omu mubiri Gwe. Luka 22.44. “Ku Yaasaasire munonga, Yaayezirika kushaba; etuutu Ye yaashusha nk'amatondo mahango g'eshagama omu kuragarika ahansi.”

Kwonka ekiro kimwe ebyo bigyere by'omuringa biryayemerera aha nsi. Kandi Aryaba Omucwi w'emanja w'ensi yona, kandi Aryacwera abantu emanja omu buringaniza n'okuhikiirira. Kandi tiharibayo okweshara orwo rubanja. Tihariho kuhindura aha kucwa orubanja okwo. Tiharibaho kworobyamu omu kucwa orubanja orwo. Enkozi y'ebibi eryaguma eri enkozi y'ebibi. Osiisikaire aryaguma ari osiisikaire. Ogwo otahinduka tarihinduka obwo, ahakuba takahindukaga kandi tarihinduka. Ebyo bigyere by'omuringa biryacyanyagura omuzigu.

Biryacwekyereza antikristo, enyamaishwa hamwe n'ekishushani kandi na byona ebibi ebiri omu maisho Ge. Aryacwekyereza entwaza z'amakanisa ageetereirwe Eiziina Rye gakashiisha ekitiinisa kyaryo atyo azicwanyagure hamwe na antikristo. Abanyabibi boona, abaikiriza ngu Ruhanga tabaho, abarikwikiriza ngu tihaine ekirikubaasa kumanywa ahari Ruhanga, ab'omurembe, abarikwikiriza ngu omuntu aine obugabe kutoorana enyetwara ye, boona baryaba bariyo. Rufu, okuzimu, kandi n'ekituuro biryaba biriyo. Eego biryaba biriyo. Ahakuba ku Ariija, ebitabo biryashuuruurwa. Obwo nibwo n'ekanisa ya kooyakooya n'abaishiki abashugaine bataano abashema bariirebeka. Aryashoorora entaama omu mbuzi. Ku Ariija aryatwara obukama, ahakuba n'Obwe, kandi Aryaba ari hamwe n'enkumi emirundi obukumi, Omugore We, orikwija Kumuheereza. Ekitiinisa! Oo, ni hati nari tiburibaho. Yeteise obwire butakahweire. Sisiimuka orugye omu bafu otyo osherure Ruhanga kugira ngu oijuzibwe Omwoyo Orikwera We kitari ekyo noiya kufeerwa amagara agatahwaho. Okikore hati hakiriho obwire.

4. Eiraka Rye Rikaba Nirihoorera nk'Amaizi Maingi

Hati amaizi maingi nigooreka ki? Kihurire omu Kushuuruurwa 17:15, “Amaizi agu waareeba . . . n'abantu b'emiringo mingi n'emitwe mingi n'amahanga n'endimi.” Eiraka Rye rikaba nirihoorera nk'abantu baingi abarikugamba. Niki? N'okucwa orubanja. Ahakuba aga n'amaraka g'emitwe mingi yaabajurizi, abu ahabw'Omwoyo Orikwera omu busingye bwona baajuriire Kristo kandi bakabuurira Engiri Ye. Riryaba riri eiraka rya buri muntu nirisingisa orubanja omusiisi owaayangire kuhaburwa. Amaraka g'entumwa mushanju garyahurirwa kurungi. Abo babuurizi abeesigwa abaaburiire amaani ga Yesu g'okujuna, abaabuuriire okubatizibwa omu maizi omu Iziina rya Yesu, abaabuuriire okwijuzibwa n'amaani g'Omwoyo Orikwera, abaayemereire n'Ekigambo okukira n'amagara gaabo; boona bakaba bari eiraka rya Yesu Kristo ahabw' Omwoyo Orikwera omu busingye bwona. Yohaana 17:20, “Tindikushabira abo bonka, kureka n'abandi Abariinyikiriza ahabw'ekigambo kyabo.”

Orateekateekire nk'oku kirikutiinisa aha muntu orikutwarwa amaizi ataine kihwera arikuza aha bururuma? Teekateeka aha kururuma okwo ariyo nairira haihi n'okucwekyerera kwe okurikuteekwa kubaho buzima. Kandi buzima ekiri nk'ekyo nikyo kiriyo nikiija aha izooba ry'okucwerwa orubanja obu okururuma kw'amaraka g'omutwe gw'abantu baingi barikushinja ahabw'okutahurira obwire butakahweire. Taho omutima eshaaha egi yonyini. Ahakuba omuri obu bwire ebiteekateeko byawe biriyo nibhandiikwa omu iguru. Okwo ebiteekateeko byawe bigamba okukira ebigambo byawe. Nk'omufarisaaayo owaayegambireho bingi n'akanwa ke, kwonka atarikuhurikiza Mukama, omutima gwe gukasiisikara kandi gwaba mubi okuhitsya obu obwire bwahweireyo, nangwa na hati oku nikubaasa kuba okwetwa kwawe okw'aha muheru kuhurira Ekigambo n'okukyakiira kuheebwa amagara agatahwaho. Obwire buryaba bwahweire ku orihurira okururuma kw'amaraka maingi g'okucwerwa orubanja n'okucwekyerera.

Kwonka oreetegyereize oku okuhoorera kw'amaizi kurikubaasa kuba kurungi kandi okurikuhuumuriza? Nkunda kushoha, kandi nkunda kusherura omwanya ahu amaizi garikusheneneka nigaborogota. Nimbaasa kubyama kandi mpurire nigagamba obusingye n'okushemererwa hamwe n'okumarwa omu mutima gwangye. Ka ninshemererwa okuba mpamiire omu mwanya gw'oburuhuukiro ogurinzirwe ahu eiraka rya Mukama rigamba obusingye, nk'oku Ekigambo ky'amaizi ag'okweza kyarangiriire. Ka tushemereire kusiima okuhurira eiraka Rye rya rukundo n'okureebererwa n'obwebembezi kandi n'oburinzi. Kandi eizooba rimwe turyahurira eiraka eryo rimwe rurungi nirigamba, hatari omu rubanja, kureka omu kututangirira itwe abu ebibi byaitu bisaasiirwe ahabw'eshagama Ye, abu amagara gaabo gajwire Omwoyo, kandi abu okugyenda kwabo kwabaire kuri omu Kigambo. N'enki ekyakubaasa kuba eky'omuhendo okukira okuhurira amaraka maingi agarikutangirira kandi n'okwetooroowa n'egyo mitwe mihango y'abantu abaikiriize kutunga amagara agatahwaho? Oo, tihariho ekiri nkakyo. Ninshaba ngu muhurire eiraka Rye kandi mutagangaaza emitima yaanyu, kureka Mumwakiire nk'Omugabe waanyu.

Oo, kuri nimukireeba. Amaizi nigo gaahwerekyereize ensi, kwonka nigo maizi gamwe agaajunire Noa kandi gakagaruka gakajuna ensi yona ahabwa Noa. Hurira eiraka Rye, eiraka ry'abaheereza Be, ryaba niryeta ngu oije oyeteise kandi otungye amagara.

5. Omu Mukono Gwe Gwa Buryo Akwaitsemu Enyonyoozi Mushanju

“Omu mukono Gwe gwa buryo akwaitsemu enyonyoozi mushanju.” Hati buzima twamanyire okuruga omu mushororongo gwa makumi abiri eki buzima enyonyoozi mushanju ziri. “Amakuru g'enyonyoozi mushanju nibo baamaraika (entumwa) b'ago makanisa mushanju.” Hati titukaabaasa kukora enshobi omu nshoboorora yona hanu, yaaba Naagitushoboororera. Ezi nyonyoozi mushanju nizo ntumwa aha busingye mushanju bw'ekanisa oburikwihaihana. Tizeetsirwe maziina. Zoorekirwe kwonka nka mushanju, emwe ahari buri busingye. Kutandikira aha Busingye bwa Efeso kuhikira kimwe ahari obu Busingye bwa Laodikia buri ntumwa ekareeta obutumwa bw'amazima aha bantu, etarikuremwa kukirinda, Ekigambo kya Ruhanga ahari obwo busingye. Buri emwe ekaba ekiramatiraho. Zikaba zihamiire omu bwesigwa bwazo aha mushana ogwabandize. Buri busingye ku bwabaire buruga ahari Ruhanga, entumwa Ye erikwesigwa ekaba egarura obusingye obwo aha Kigambo. Amaani gaazo gakaba nigaruga ahari Mukama kitari kityo tizaakubaasize kuzibira ebingonzi. Zikaba ziri buhooro omu kureeberera Kwe, ahakuba tihaine ekyabaire nikibaasa kuzishahura omu mukono Gwe, nari ekyabaire nikibaasa kuzitaanisa na rukundo ya Ruhanga, ka bube oburwaire, akabi, okujwara busha, enjara, rurara, amagara nari rufu. Buzima zikaba zimweheereire kimwe kandi zirinziirwe amaani Ge agataine bugarukiro. Zikaba zitarikufa aha kuhiigwa okwabaire nikuzihikaho. Obusaasi n'okushekyererwa bikaba bitari kindi kureka eky'okureetera kuha

Ruhanga ekitiinisa kugira ngu ziteekateekweho kuba zishemereire kubonabonesibwa Ahabwe. Kandi omu kusiima ahabw'okujuna Kwe zikaaka n'omushana gw'amagara Ge kandi zaayoreka rukundo Ye, okugumisiriza, obucureezi, okwerinda, okutwaza gye, obwesigwa. Kandi Ruhanga yaabashagika n'eby'okutangaaza, obumanyiso, kandi n'eby'amahano. Bakaregwa ngu n'abarikurengyesereza omu kwikiriza kwabo, kandi ngu n'abarikwera abeekuringa ahansi. Bakangwa ebibiina by'amadiini kandi baateerera enaku, kwonka baaguma bari abeesigwa aha Kigambo.

Hati tikigumire kwemerera kandi okaguma ori omwesigwa aha nyikiriza y'ediini. Nikirahuka, ahakuba Sitaane buzima ari enyima y'ebyo byona. Kwonka n'ekintu ekindi kuba omwesigwa aha Kigambo kya Ruhanga n'okugaruka aha ki Ekigambo kyabandize kukora ahanyima ya Pentekoote.

Enshumi nkye ehingwire omushaija akangambira ngu Ekanisa y'Abakatoriki eya Rooma ekaba neeteekwa kuba niyo kanisa y'amazima ahabw'okushangwa yaabaire eri enyesigwa aha bi yaikiriize omu myaka egyo yona, kandi ekaguma neehanguha kandi etarikuhinduka. Ekwo tikwo kiri na kakye. Ekanisa yona erikushagikwa gavumenti, eine n'enyikiriza zaayo ezitari Kigambo na kakye, kandi etaine buheereza obworekirwe n'Omwoyo Orikwera kureetera sitaane kwimukiirira, buzima ekaba neebaasa kugumizamu. Ekwo kikaba kitari ngyenderwaho. Kwonka waateekateeka ahari ako kabiina kakye aku abashomi baako baashatwirwemu habiri n'omusimeeno, bakagaburirwa entare, bakahiigwa, kandi bakagyemwa kuzengyerera kwonka bakaguma bari abeesigwa aha Kigambo - hati buzima ogwo naateekwa kuba ari Ruhanga. Oku baahonokire omu rugamba rwabo rw'okwikiriza kandi bakagumizamu: EKYO n'eky'amahano.

Kandi okuba gye oku ti kw'entumwa mushanju z'obusingye bw'ekanisa zonka. Buri mwikiriza w'amazima ari omu ngaro za Ruhanga kandi naabaasa kutunga ahari rukundo Ye n'amaani, kandi atungye ebirungi byona ebi Ruhanga ari aha mwikiriza. Ebi Ruhanga aha entumwa, kandi n'oku aheereza omugisha kandi akakoresa entumwa, n'eky'okureeberaho ky'oburungi Bwe aha baikiriza boona kandi n'okureeberera Kwe aha ngingo ZOONA ez'omubiri Gwe. Amiina.

6. Rurara y'Amoogi Abiri

“Omu kanwa Ke haarugamu rurara ey'amoogi abiri.” Omu Baheburaayo 4:12, “Ahakuba Ekigambo kya Ruhanga kiine amagara n'amaani, kiine obwogi bwingi okukira rurara yona ey'amoogi abiri, nikipumita kihika ahu kitaanisiza amagara n'omwoyo, engingo n'omushokooro, kandi kirahuka kucaaka ebi omuntu arikuteekateeka n'ebi amaririire omu mutima gwe kukora.” Okuruga omu kanwa Ke hakarugamu rurara y'amoogi abiri nikyo KIGAMBO KYA RUHANGA. Okushuuruurwa 19:11-16, “Ku naimukize amaisho, naareeba eiguru rikinguukire n'embaraasi (erikwera). Ogishutamihho naayetwa Mwesigwa, kandi Mazima. Niwe acwa emanja kandi Niwe arwana engamba omu kuhikiirira. Amaisho Ge nigashusha nk'endimi z'omuriro; kandi ajwaire ebirunga bingi aha mutwe; Aine eiziina erihandikirwe, eritarikumanywa muntu weena kureka We Wenka. Ajwaire ekijwaro ekimiisiirwe eshagama, kandi Eiziina Rye ni KIGAMBO KYA RUHANGA. Amahe g'omu Iguru Gaamukurata gatembire embaraasi zirikwera, bajwaire emyenda ya kitaani erikwera kandi emirungi munonga. Omu kanwa Ke haarugamu rurara y'obwogi ey'okutemesa amahanga; kandi Aryabategyekyesa enkoni y'ekyoma, Abaribatiirire omu inyuuikiro ry'obushaarizi bw'ekiniga kya Ruhanga Ow'obushoboorozi bwona; kandi aha kijwaro Kye n'aha kibero Kye hahandikirweho Eiziina eri, OMUGABE W'ABAGABE, KANDI OMUKAMA W'ABAKAMA.”

Yohaana 1:48, “Nasanaeli yaamugira ati: Wamanyisibwa ki? Yesu yaamugarukamu ati: Filipo atakakwetsire, obu waaba ori ahansi y'omutiini, Naakureeba.” Reeba nkikyo. Ku Ariija, Ekigambo ekwo nikiija kurwanisa amahanga goona kandi n'abantu boona. Kandi tihariho n'omwe oribaasa kukihakanisa. Nikiija kushuuruura ebyabaire biri omuri buri mutima nk'oku Yaakozire Nasanaeli. Ekigambo kya Ruhanga kirayoreka owaakozire okukunda kwa Ruhanga n'otarakukozire. Kiryashuuruura emirimo y'omu mubonano eya buri muntu kandi n'ekyamureeteire kugikora. Nikiija kutaanisa. Okwo nikwo kirikugamba omu Barooma 2:3, “Iwe omuntu, ocwera abakora nk'ebyo orubanja, haza naiwe noobikora, nooteekateeka ngu oryakira orubanja rwa Ruhanga?” Bwanyima nikipumizamu kigamba oku Ruhanga arikuza kucwera abantu emanja. Kiri hanu omu mushororongo gwa 5 kuhika aha gwa 17. Omutima ogugumire ogutarikweteisa guryacwerwa orubanja. Emirimo eryacwerwa orubanja. Ebigyendererwa biryacwerwa orubanja. Omu maisho ga Ruhanga tiharihaho kushorora; kureka boona ekwo Kigambo kiryacwera orubanja, hatariho n'omwe kutoroka orubanja. Abo abaahuriire kandi batateho omutima baryacwerwa orubanja n'ebi baahuriire. Abo abaakihuumuriiremu barikugira ngu bakakiikiriza, kwonka batakituure, baryacwerwa orubanja. Buri mubonano niguza kwihwayo gureetwe omu bantu boona kandi gugambirwe aha katungu k'enju. Oo, buzima obwo turyayetegyereza ebyabaireho. Tihariho naama eritsigarayo omu busingye bwona.

Kwonka noomanya ngu Naashuuruura emibonano y'omu mitima y'abashaija n'abakazi omu busingye obu obu tutwiremu? N'oha ondijjo owaakubaasa kushuuruura emibonano y'omu mutima kitari Kigambo, Kyo kyonka? Abaheburaayo 4:12, “Ahakuba Ekigambo kya Ruhanga kiine amagara n'amaani, kiine obwogi bwingi okukira rurara yona ey'amoogi abiri, nikipumita kihika ahu kitaanisiza amagara n'omwoyo, engingo n'omushokooro, kandi kirahuka kucaaka ebi omuntu arikuteekateeka n'ebi amaririire omu mutima gwe kukora.” N'Ekigambo. Nikikora ekigyendererwa eki kyatumiiirwe, ahakuba Kyo (Ekigambo) kiijwire amaani. N'Omwoyo ogwo omwe owaabaire ari omuri Yesu (Ekigambo) oriho omu kanisa ogundi murundi omu busingye obu obw'aha muheru nk'akamanyiso k'aha muheru naagyezaho kuhabura abantu okutaza omu rubanja, ahakuba Abarikumwanga (Ekigambo) hati baaherize kutaaha omu rubanja, bagarukire Kumubamba. Abaheburaayo 6:6, “Abo, ku bagwa

baabirugamu, kiba kitakibaasika kubagarura bwa kabiri omu kweteisa, ahabw'okuba baba bagarukire kwebambira Omwana wa Ruhanga aha musharaba, n'Okumukwatsa enshoni butunu.”

Hati Paulo akagira ngu Ekigambo kikaija omu maani nk'oku kyaizire omu iraka. Ekigambo ekyabuuriirwe buzima kikeeyoreka. Nka rurara erikumurinkana, erikushara kikaza omu biteekateeko by'abantu, kandi nk'omusyo gw'omushaho oshemeza abantu kikashara kyaihamu endwara kandi kyabohoorora embohe. Hoona-hoona ahu abaikiriza aba aba ira baabaire baza, “bakaba bagyenda nibabuurira Engiri (Ekigambo) kandi Ruhanga ahama Ekigambo ekyo n'obumanyiso obwabaire bukikomookaho.” Abarwaire bakatambirwa, baadaimoni baabingwa, kandi bagamba omu “ndimi” nsya. Ekyo kikaba kiri Ekigambo omu bikorwa. Ekigambo ekyo tikikaremwaga omu kanwa k'Abakristaayo abarikwikiriza. Kandi omu busingye obu abw'aha muheru kiri hanu kiine amaani maingi munonga okukira obundi bwire bwona omu mugore Kigambo ow'amazima. Oo, busyo bukuye 'mwe, imwe abakye omu mubaro, muramatire aha Kigambo, mukijuze omu kanwa kaanyu n'omu mitima yaanyu, kandi eizooba rimwe Ruhanga aryabaha obwo bukama.

7. Ahamaisho Ge Nk'Eizooba

“Kandi ahamaisho Ge hakaba nihamurinkana nk'eizooba eririkujwisa amaani.” Matayo 17:1-13, “Ku haahingwireho ebiro mukaaga, Yesu yaagyenda na Petero na Yakobo na Yohaana omurumuna, yaabahitsya aha mutwe gw'orushozi ruraingwa bonka. Yaahindurirwa omu maisho gaabo, ahamaisho Ge haamurinkana nk'eizooba, n'ebijwaro Bye byayera nk'omushana. Kandi Musa na Eliya baareebeka omu maisho gaabo, nibagaaniira Nawe. Petero yaagambira Yesu ati: Mukama wangye, ni kirungi obu turi aha; ku Oraabe nookunda, twombekye obuju bushatu, akamwe kabe Akaawe, akandi kabe aka Musa, n'akandi aka Eliya. Ku yaabaire naakigamba, haija ekicu ekirikwengyenyeta, kyabasangira, eiraka ryakyemamu nirigira riti: Ogu n'Omwana Wangye Ou nkunda, Ou nyesiimira munonga; Mumuhurire. Abeegi ku baarihuriire, baagwa bajumaire, batiinire munonga. Yesu yaija, yaabakoraho, yaabagambira ati: Mwimukye, mutatiina. Ku baajumwire amaisho, tibareeba muntu weena kureka Yesu wenka. Bwanyima ku baabaire nibashuuma nibaruga aha rushozi, Yesu yaabeehanangiriza ati: Mutagira ou mwagambira ebi mworekirwe, okuhitsya obu Omwana w'Omuntu arizooka omu bafu. Abeegi Be Baamubuza bati: Ahabw'enki abahandiiki bagira ngu: Eliya ashemereire kubanza kwija? Yaabagarukamu ati: N'eky'amazima; Eliya aryaija, ashemeze byona; Kwonka nimbagambira ngu, Eliya akaheza kwija; kwonka tibaramumanyire, kureka bakamutwaza, nk'oku baayenzire. Kandi hoona n'Omwana w'Omuntu nikwo Barimubonabonesa. Aho niho abeegi Be baihire kumanya ku Arikubagambira ahari Yohaana Omubatizi.”

Hati omuri Matayo 16:28, erikubandiza Matayo 17:1-13, Yesu akaba yaagambire ati, “Omuri aba abemereire aha, hariho bamwe abarireeba Omwana w'Omuntu naija omu bukama Bwe batakafiire.” Kandi entumwa ezo ishata ekyo zikakireeba - omuringo ogu Ariiziramu omurundi gwa kabiri. Bakamureeba naahindurirwa okwo aha mutwe gw'orushozi. Ebijwaro Bye bikaba nibyera nk'omushana kandi ahamaisho Ge nihamurinkana nk'eizooba oku ryaka omu maani gaaryo. Kandi aho ahu yaareebekyeire, hakeemereraho Musa na Eliya ahari buri rubaju Rwe. Buzima okwo nikwo Arikwija kugaruka. Buzima Eliya niwe oribanza kwija ahindure emitima y'abaana (omugore) bagarukane n'Enyegyesa y'Ekigambo ky'abazaire Entumwa. Malaki 4:5,6, “Reeba, Ndyaboherereza nabi Eliya, ekiro kya MUKAMA ekikuru kandi ekirikutiinisa kitakaizire. Niwe arihindura emitima y'abazaire bakagarukana n'abaana baabo, n'ey'abaana bakagarukana n'abazaire baabo, ngu Ntakaija nkaitsa ensi omukyeeno.”

Israeli yaabaire ihanga. Hati ehamire n'amahe gaayo, eihe ry'aha nyanja, enkora ya posita, ebendera, n'ebindi ebirikukora eihanga. Kwonka hakiriyo Ekyahandiikirwe ekishemereire kuhikiirira ekirikugira kiti: “. . . Eihanga rikaabaasa kuruga omu nda omu kaanya kakye?” Isaaya 66:8. Ekiro ekyo nikiija juba. Omutiini gwatookire. Abaisraeli bategyereize Mesia. Bamwiniire ekihika kandi ekihika kyabo kiri haihi kuba kyahikiirira. Israeli eryagaruka ezaawe omu buryo bw'Omwoyo, ahabw'okuba Omushana gwayo n'Amagara gaayo biri haihi kuba byagishuuruurirwa.

Omu Kushuuruurwa 21:23 nihagira hati, “Orurembo orwo tirwetenga izooba nari okwezi kurwakira, ahakuba ekitiinisa kya Ruhanga nigwo mushana gwarwo, kandi Omwana gw'Entaama niwe tabaaza jaarwo.” Egi ni Yerusalemu Ensy. Omwana gw'Entaama aryaba omuri orwo rurembo, kandi ahabw'okubaho Kwe, tiharyetenga mushana. Okwo izooba tiririturuka kandi rikajwa, ahakuba Niwe Izooba n'Omushana byaho, We wenka. Amahanga agarirwijuamu garyagyendera omu mushana Gwe. Timushemereirwe ahabw'okugira ngu eizooba eryo ritwiriire haihi? Yohaana akareeba eizooba eryo niriija. Eego, Mukama Yesu, Ija juba!

Malaki 4:1-3, “Ahakuba reeba, eizooba niriija, niryotsya nk'etanuuru, obu abanyamaryo n'enkozi z'ebibi bariba nk'ebitsintsi by'embuba; ekyo kiro ekiriija kiryabookyeza kimwe, tikiribatsigira muzi n'obu ryakuba eitaagi; nikwo MUKAMA ow'amahe arikugira. Kwonka imwe abarikutiina Eiziina Ryangye, Eizooba ry'Okuhikiirira riryaturuka ahabwanyu, riine okutamba omu mapapa Gaaryo. Muryashohora nimukina nk'enyana zirikiruga omu kihongore. Aha izooba eri Ndikorera, muryaribatiirira ababi, babe eiju ahansi y'ebigyere byanyu; nikwo MUKAMA ow'amahe arikugira.” Nkikyo aho ogundi murundi. EIZOoba nirijwisa amaani gaaryo goona. Oo, amaani g'Omwana wa Ruhanga nigaakira ahagati y'ebikondo by'etabaaza mushanju eby'ezaabu. Ngugwo Ayemereire, Omucwi w'emanja, Ogwo owaabonaboine kandi akatufeera. Akeekorera ekiniga kingi kya Ruhanga ari wenka. Akanyuukira omu inyuukiro rya viinyo ry'ekiniga kya Ruhanga ari wenka. Nk'oku twaheza kugamba, aha musiisi, eiraka Rye ni nk'okuhoorera kw'obururuma nari ebingonzi bya rufu birikwecundira aha nkiri z'aha

nkungu. Kwonka ahari orikwera, eiraka Rye ni nk'eiraka ry'akagyera akarikweshongora ekyeshongoro kirungi waaba obyami ohuumwire, omazirwe omuri Kristo. Naatwemurikira n'amaranzi ga rukundo Ye erikutagata Naagira ati, "Mutatiina, Niinye Ogwo Owaabaire Ariho, Ogwo Oriho, Ogwo Oribaho; Niinye Ow'obushoboorozi bwona. Tihariho ondijjo kureka Nyowe. Niinye Alufa na Omega, Niinye BYONA." Niwe Irebe ry'omu ruhanga, Enyonyoozi y'omu Kasheeshe Erikumurinkana. Niwe Orikukira oburungi abantu omutwaro aha magara gangye. Eego, ekyo kiro kikuru kiri haihi kusheesha reero Eizooba ry'Okuhikiirira riryaturuka riine okutamba omu mapapa Garyo.

KRISTO OMUSINGUZI

Okushuuruurwa 1:17-18, "Ku Naamureebire, naagwa aha bigyere Bye nk'ofiire. Kwonka Yantaho omukono Gwe gwa buryo naagira ati: Otatiina; Niinye w'Okubanza kandi Ow'aha muheru, (Niinye Ogwo ohuriire) nkaba nfiire, mbwenu Ndi ohuriire ebiro byona; (Amiina) kandi Nyine ebishumuruza bya rufu n'okuzimu."

Tihaine omuntu owaakubaasize kugumira amaani g'okworekwa okwo. Amaani ge gahwereire kimwe, Yohaana akagwa aha bigyere Bye nk'Ofiire. Kwonka omukono gwa Mukama omuri rukundo gukamukwataho, kandi eiraka ry'omugisha ryagira riti, "Otatiina. Reka kugira obwoba. Niinye Ow'okubanza kandi Ow'aha muheru. Niinye Ogwo ohuriire, nkaba nfiire, mbwenu Ndi ohuriire ebiro byona." Ni kintu ki ekiriho ky'okutiina? Ekifubiro eki Yaatungire aha musharaba, aha kituuro, kandi n'obu Yaashuuma, kikaba kiri ahabwaitu. Akatwara obusaasi bwona bw'obuhuta bw'ekibi n'ahabw'ekyo abari omuri Kristo Yesu tibakiine rubanja. Reeba buzima "Omutonganirizi" waitu niwe "Muramuzi" waitu. Niwe byombi "Omutonganirizi" kandi "Omuramuzi." Nk'omuramuzi "tihakiriho rubanja" - ruhweire. N'ahabw'ekyo hati tihakiriho rubanja. Ahabw'enki ekanisa neetiina? Ni kuraganisibwa ki oku Araremire kuhikiiriza omu maisho gaitu? Ahabw'enki neetiina ekifubiro nari okufa? Byona bikasingurwa. Ngu hanu omusinguzi mukuru. Ngugu hanu Ogwo Owaasingwire ensi zombi erikureebwa n'etarikureebwa. Ti nka Alexander, owaasingwire ensi aine emyaka makumi ashatu n'eshatu kandi ahabw'okutamanya ogundi muhanda gw'okutoora kwenda ngu ayeyongyere kusingura, n'ahabw'ekyo akafa ari enkwatwa y'ekibi kandi n'emwicwe mibi. Ti nka Napoleon, owaasingwire Buraaya yoona kwonka aha muheru akasingurwa ahari Waterloo atyo akabingwa akatwarwa Elba, akeeshanga yaasingwirwe. Kwonka tihariho kintu ekyakubaasa kusingura Kristo. Ogwo owaashuumire hati atembire yaaza ahaiguru ya byona, kandi ahairwe Eiziina eririkukira amaziina goona. Eego, akasingura rufu, okuzimu, kandi n'ekituuro, kandi aine ebishumuruza byabyo. Eki Akomoorora kikomoororwa, eki Aboha, kibohwa. Tihariho kukihindura. Tihakabahoga musinguzi Owaamubandiize kandi tihariho ondijjo kureka We. We wenka niwe Mujuni, Omucunguzi. Niwe Ruhanga WENKA: kandi "Mukama Yesu Kristo" niryo Eiziina Rye.

"Yohaana, otatiina. Mutatiina, imwe obusyo bukya. Byona ebi Ndi, muri abahunguzi baabyo. Amaani Gangye goona n'agaanyu. Obushoboorozi Bwangye n'obwanyu Naaba nyemereire ahagati yaanyu. Tinaija kureeta okutiina hamwe n'okuremwa, kureka rukundo n'okugumya emitima hamwe n'okubaasa. Mpairwe obushoboorozi bwona kandi n'obwanyu kubukoresa. Imwe mugambe Ekigambo Naanye niinyija kukihikiiriza. Egyo n'endagaano Yangye kandi terikubaasa kuremwa."

ENYONYOOZI MUSHANJU N'EBIKONDO BY'ETABAAZA

Okushuuruurwa 1:20, "Amakuru g'enyonyoozi mushanju ezi waareeba omu mukono Gwangye gwa buryo, kandi n'ebikondo by'etabaaza mushanju eby'ezaabu, ezo nyonyoozi mushanju nibo baamaraika (entumwa) b'ago makanisa mushanju, kandi ebyo bikondo by'etabaaza mushanju nigo makanisa mushanju."

Twaherize kujumbura amazima g'enaama ibiri ezi. Oo, titukashuurwire abu ezi ntumwa mushanju zaabaire ziri, kwonka ahabw'okuhwerwa Ruhanga nitwija kuzishuuruura kandi enaama egyo neija kuhikiirira. Obusingye mushanju nitubumanya. Bhandiikirwe omu Kigambo, kandi nitwija kureeba buri bumwe kugira ngu tuhikye aha busingye obu obw'aha muheru obu tutwiremu.

Kwonka omu kuringuriza okurikuhendera eshuura egi, Mumureebe nk'oku Ayemereire ahagati y'ebikondo by'etabaaza by'ezaabu aine enyonyoozi mushanju omu mukono Gwe gwa buryo. Oo, ka nikimara omutima omunda Okumureeba ayemereire aho omu Bwaruhanga Bwe Oburikukirayo obukuru. Niwe Muramuzi, Omunyamurwa, Omugabe, Empungu, Omwana gw'Entaama, Entare, Alufa, Omega, Okutandika kandi Okumariira, Isheboona, Omwana, Omwoyo Orikwera, Ogwo Owaabaire Ariho, Ogwo Oriho, Ogwo Oribaho, Ogwo Ow'obushoboorozi Bwona, Ogwo BYONA OMURI BYONA.

Reeba Ngugwo, Omutandiki kandi Omuhikiiriza. Ogwo Mwana gw'Entaama ashemereire! Akahamya Okubaasa Kwe obu yaagura Okujunwa kwaitu We wenka. Hati ayemereire omu maani Ge goona kandi n'ekitiinisa Kye kyona n'ebintu byona Bimuhairwe nk'Omucwi w'emanja.

Eego, Ngugwo Ayemereire ahagati y'ebikondo by'etabaaza, aine enyonyoozi omu mukono Gwe. Ni nyekiro, ahakuba obwo nibwo tukoresa etabaaza kuha omushana, kandi obwo nibwo enyonyoozi zirikureebwa nizaaka zirikugarura omushana gw'eizooba. Kandi bwizire. Ekanisa neegyendera omu kwikiriza omu mwirima. Mukama waayo akaruga omu nsi egi kwonka Omwoyo Orikwera naakyakira omu kanisa, naaha omushana ensi egi ekuzire ekyeenirwe n'ekibi. Kandi enyonyoozi ezo nazo zigarura omushana Gwe. Omushana gwonka ogo ziine n'omushana Gwe. Ka bwizire - ka n'obufuki bw'omwoyo. Kwonka ku Aija ahagati guba omushana kandi etagata, etyo ekanisa

eheebwa amaani kandi okurabira Omuriwe ekora emirimo nk'ei Yaakozire.

Oo, ku twakubaasa Kumunagaho eriisho nka Yohaana. Tushemereire kuba abantu ba muringo ki, twemereire omu maisho Ge aha izooba eryo!

Ku oraabe Otakamuhairi amagara gaawe, hayo omutima gwawe ahari Ruhanga obwire obu, kandi otsimbe amaju ah'ori honyini oshabe okusaasira Kwe ahabw'ebibi byawe, reero oheyo amagara gaawe Ahariwe. Obwo nitwija kugyezaho kureeba Obusingye Mushanju bw'Ekanisa hamwe; kandi twaba nitukikora ninshaba ngu Ruhanga aije kuhwera omuheereza We ogu otashemereire kubashuuruurira Ekigambo Kye.



www.messagehub.info

Obutumwa obu bukabuurirwa
William Marrion Branham
“... omu biro by'eiraka ...” Kush 10:7